

國朝常州駢體文錄

國朝常州駢體文錄卷第三目

味經寫文一首 無錫秦蕙田樹峰

辭薦舉鴻博啟

葉徵君文一首 荆谿葉翥鳳

乾元統天頌

試峻堂文三首 江陰王蘇儕嶠

授受禮成恭賦 謹敘

秦漢瓦當文賦

賦賦

泰雲堂文四首 金匱孫爾準平叔

聖駕東巡 盛京祇謁

祖陵禮成恭賦 謹敘

水僊夢賦

六朝金粉敘

秦漆漁吳吟合艸敘

國朝常州駢體文錄卷第三目

國朝常州駢體文錄卷第三

味經窩文

無錫秦蕙田樹峰

辭薦舉鴻博啟

竊惟國家設制科之典所以待非常之才典曠世而一逢才應期而特出是必見閭淹洽合萬物以周知辭藻淵通兼三才而其貫舉大不遺夫小尋源以及其流由其殫究典墳含茹耶索天心月脅之奧蘭絲牛毛之微離合折衷夫百家同異研求乎四代迺爲醇儒之抵蘊學海之眞原至于龍門柱下東觀蘭臺道術遞更文章流別旣提綱而挈要復彊記以博聞下逮諸子百家皆資考訂稗官野乘總與搜羅苟沈寢而酣嬉乃縱橫而旁薄於是抽豪作賦遠薄風騷授簡摘詞力追唐宋成章以達積厚而流若彼

宗彙微言亦翫資于心性參同妙契可借證于卦爻攷亭
曾注厥篇章洛水與窺其端趣務說心而研慮庶探蹟以
窮跂備茲體用之全斯稱鴻博之選況夫才如司馬未傳
六藝之書文似昌黎不作三都之賦杜陵野客第擅詩豪
邊氏經笥僅居樸學蓋理雖一致而變有萬端彼皆軼代
之雄姿猶且專門而各詣某才同譏綫技耻雕蟲束髮受
書知閉門而玩索酌蠡測海時望洋以驚疑半部初尋一
經未殖編年列傳僅略得其大凡中論法言祇淺窺乎粗
迹聲律未幾於深造剽竊寔比於閎通目攝全牛胃空半
豹方媿棲遲里巷難窺七略之臧奔走饑寒屢廢三冬之
業徒以虛聲致悔矣供志彙之編摩鈍筆奚堪無補

朝廷之著作正撫膺而自作乃薦牘之下臨悚懼交并形

神竝膺

葉徵君文

荆溪葉翥鳳

乾元統天頌

臣聞德合天者謂之皇德合地者謂之帝天地之所以毓萬彙者并容而徧覆帝王之所以參天地者普愛而無私高辛氏之前尚矣唐典之頌堯德也繇親睦九族馴致萬國時雖之盛而庭堅頌舜日臨下以簡御眾以寬總之爲好生之德自時厥後夏后氏修唐虞之道民用以寧商之興也代虐以寬周之王也以仁易暴蓋自剖元立極以來歷聖代興靡不茂毓羣生光濟六合然必至唐虞氏而庶績咸熙萬國咸寧暨覆載齊其量焉延及三代異世同風斯誠寰宇太和之氣旁薄鬱積之極盛者也宣聖生春秋之季道德功利刑名度數百氏之學雜然並興懼後之王

者無以持一統故上述中天下悼三季所以隆替消息之
原畢箸之於經其在易曰元者善之長也君子體仁足以
長人書崇二典詩肇二南麟史以體元爲君職胥此志也
繇東周而降兩漢之初與民休息唐之盛修行仁義而治
本未醇宋之隆崇尙寬仁而治法未備明祖口誦仁義心
嚮刑名雖莫不拓迹開統敷化盛人而因利乘便代翕代
張大率趨一時之宜未足以續唐虞三代之盛實哉邈乎
聖主之難逢而至治之不易觀也洪惟 國朝

太祖高皇帝神武應期肇造區夏

太宗文皇帝丕顯鴻烈載續神功

世祖章皇帝天亶聰明混一文軌蓋與太皞氏之造皇圖
軒轅氏之恢帝統靡以異焉欽惟

聖祖仁皇帝經文緯武涵濡於六十載之中

世宗憲皇帝睿斷神謀規畫於十三年之內三辰順於上
九功敘於下民用太和物用咸若溥有形而歸命罄無外
以宅心凡夫雜霸之規模小補之氣象至 皇朝而蕩滌
揮灑無遺迹焉敦龐淳固之氣與天地相終始而

皇上以大聖之姿敬承厥後欽惟我

皇上神明冠古文思光天藝總六經道通三極宅憂以來
革千載易月之制遵三年致喪之儀盡愍盡敬必信必誠
大孝之所以通於神明也體天心之復大德曰生協天德
之剛健行不息豈弟積於宮庭仁讓孚於殊俗至誠之所
以浹於中外也益稷夔龍弼亮於上周召毛畢光輔於下
總集耆英旁羅俊乂九皋有鳴鶴之頌空谷無白駒之音
大化之所以塞於天淵也纂

三祖之不基紹

二宗之鴻烈以唐虞之道爲必可行以三代之治爲必可復益之如天涵之如海蠲二十年未輸之賦而淮海盈寧懷二十載未服之戎而邊隅清泰凡夫詔諭之旨闡洙泗之淵源蹈尼山之閭域自京都士庶以暨窮荒僻壤山陬海澨之氓罔勿騰踊惟愉以爲

聖人之既作而大化之將成也霸一變至於王王一變至於帝三代以來孰有以純心純政反近古之陵夷追往聖之絕業如

皇上者哉宋明道程子有言無古今無治亂能盡其道則大治或用其偏則小康由其說覈之漢唐宋明於前聖之治誠有間矣然漢有高文之寬簡唐有貞觀開元之政教宋有藝祖仁宗之寬厚而明之孝宗純用儒術獨優於前代不可謂非近古之賢君治安之符驗也夫僅用其偏尙

克培護元氣間數百載太平之基矧我

皇上纘

列聖之鴻緒勤勤懇懇爲萬世規以惻怛忠愛協勳華之上德以慈和溫惠邁成周之至理者哉然則六藝之微言素王之妙蘊越二千年而洛閩諸儒始克明之又將洎千年我

皇實克行之大易所謂乾元統天體仁長人之占符契參同實在今日

皇上於三千載之後復古復始俾堯舜孔氏之道焯燦炳耀天地同流萬嗣而下靡不臭馨香咀甘實宗至德仰鴻名而況臣民之屬薰蒸翔洽於

聖人之大化者與稽古極治之世有使下士獻詩矇誦賡賦者爰繹乾彖之文敬述統天之頌其辭曰

馬三
四
於鑠

皇清與天同德

列聖欽明萬邦作則於皇

聖祖德博化光陵轢殷周陶鑄虞唐

世宗嗣興乾乾翼翼經緯九壠奠安四極惟天輔德惟

皇則天克紹克類有葉有年運際重熙祥開

至聖握彼璇圖御茲金鏡

皇帝純孝諒陰是遵下悲六合上動三辰

皇帝純孝紹天立教萬國儀型千秋則效

皇帝至德大道爲公九族既睦兆庶時維

皇帝至德邦本是植欽翼天工勤勞日昃番番良士

皇則式之徵徵謠言

皇則遠之協氣橫流仁風遐暢上際下蟠大來小往穆穆

布列明明在朝四門既闢八紘爲招自東自西扶桑若木
自北自南龍荒卉服虞廷畫象周京措形渾渾顓顓蕩蕩
平平海晏河澍階罔斗運擊壤歌衢含和吐韻如飲醇醴
如沐陽春

皇恩之沛

天澤之均樹駿流鴻超三邁五大哉乾元受天之祐

試峻堂文

江陰王蘇儕嶠

授受禮成恭賦

謹敘

臣聞詩有六義賦居其一賦與詩同原與頌合體在昔華
祝衢諸軒轅帝載賡歌颺拜條暢皇風班固所謂離容揄
揚雅頌之亞者唯賦爲近洪維

太上皇帝陛下福備德基道符帝則四得必得十全悉全

以丙辰之年月正元日舉歸政大典命

皇帝卽位懿哉鑠乎開闢以來未之或觀也臣伏思賦者
鋪也敷陳其事而直言之也謹臚實事作賦一篇拜手稽
首以進其辭曰

天眷佑我 大清申錫篤祐重光重翰韡韡斐契統符闡
珍超宓犧於丁丑展大撓於甲寅絲无疆之景胙替福應
於丙辰於哉

太上皇帝之御宇也握洛鈐膺河籙考圖合誠含嘉康祿
汪濊龐洪滋液滲漉風古乎覃庸道高乎頊嚳儀祁姚而
姒盛綜勛華而受穀當甲子之旣周傳精一以從欲璿籌
積乎珠囊金鏡炳乎玉燭洵足以竝巍巍包郁郁六十有
一載正月上日春王三朝壽星煥乎大角攝提正乎招搖
合萬國集百僚四極四和九閭九霄禮備昭詠樂奏咸韶

星旄雲罕豹尾雞翹九賓之典既設四表之被方劭闢太和而敞殿俶正旦以垂膺命

子帝以繼序貫舜僖而堯曠且夫日升月恆久照寰區斯乃天保所以頌九如也位祿名壽原本大德斯乃尼父所以臚四得也雨暘寒煥睿思兢兢斯迺禹範所以念八徵也富壽康寧 聖躬肅肅斯迺箕疇所以嚮五福也元孫繞堂繩繩揖揖昌延於五世焉耄期埭政赫赫業業數過乎六帝焉十全爲寶幾敕績熙炳耀乎三古六甲紀元章開部展符合乎

聖祖案三五以論功攬京垓以啟緒曾莫罄乎名言羌難得而覲縷古也有志福者備也壽者醕也本皇極以協紀通昊緯以綏猷契應之符斯在因篤之理可求必一中之允執迺百祿之是適懿夫祀

圖丘報

方澤升馨香薦圭璧肸蠁是昭嘉貺有釋虔祈穀以有秋
申常雩而罔敷增琬琰於紫壇濬川渠以甃石驅屬車之
九九祝百昌之驛驛穆穆之儀修屬屬之忱格宜其民和
年豐而禋福日益也若夫謁景亳之都卽有蔡之舊水姬
姜以溯源邑豐沛以臧富念披墾於祖宗論難易於創守
記鹿刳之短長然糠鎔以遜懋緬衣冠之貽矩奉弓矢以
志穀勒豐碑之崇宏布方略於宇宙每昧爽以丕顯讀
寶籙而將就南端晨啟相見乎離重門洞闢六典攸司丹
扆朝仰銅漏晝稀 天顏若咫尺王言如絲寧九重以拱默
實一日而萬幾爾其圖無逸占有孚閭澤霈甘露濡周徧
乎九寓廬念乎一夫頌寶繪以待飼譬含哺乎春雛獨租
賦於秭秭戡漕運於淮湖戶隱轡以增數人作息以歌衢

爾其輝鳳闕蔭鵲池壓藻井頻形墀陽馬奕奕陰虬齧齧
金莖擎掌玉樹揚裝鏤檻文槐之巨麗藻局繡帳之陸離
緊萬瓦之縹緲籠十界以流離碧藹九芝之葢黃飄五丈
之旗雨溜而金鸞蒨粲霜凝而玉蘂離披璇題朗耀薤葉
生姿府令之集篇若揭鄼侯之題字尤奇高瞻遠矚目眴
意疑奈何後拾婁於赤眉前銷煤於項羽白壁夜歸於滄
池金鳳宵飛於大府劫燒於昆明之灰聲震於長平之鼓
淒涼魯國之甄辛苦驪山之土始浮縹而粘頰終零風而
剝雨雹散星沈烟消久剖蝸食浩穿松生葉舞昔之幃信
刻符加以三蒼中古但見漏屋餘痕折釵剩股墜棄脂之
流蠶扶荔之圃其或數椽未毀一殿歸然青瑣已落白蜃
失鮮亦復歛馮松柱側藉藤纏蒼鼠竄縫寒鴟嚇烟蟲緣
壁帶鳥啄箏弦回憶風縣碎玉棋詩倒蓮殿號千秋樹名

萬年子侯列第弄臣鑄錢銅山婁賜金穴重穿孰不含辛
茹嘆悵望寥天則有耕下杜之瀕陟近蜀之障緬三選之
遺撈八川之漲偶得元圭識爲瓦當月景常圓土雘無量
癸巳之刻未諤丙申之鼓可訪將詛楚之存眞豈元光之
設詎撫古蹟兮畱連唯文儒兮宜貺非瓦釜兮能鳴較銅
雀兮莫尙苟研礪兮未穿毋富貴兮相忘

賦賦

綜宏才於羣雅細六藝之遺文偉賦家之振宇引妙墨以
陵雲屈言情而源導荀設隱而派分別大宗於雅頌溯遙
裔平典墳羌窮高而極遠亦煥爛而烟縕錡宮徵以捶響
續纂組以鐫紋詎雕鏤之太過洵囊括乎無垠理有萬殊
體非一致緣情生文因虛構思辭實坵庸識爲旗幟簡或
數言餘或萬字京殿以宏博謀篇苑獵以喬皇紀事因征

邁以述行宗淡泊以明志繪聲則旁迨笙簫說理則上推
禮智山川則悉本圖經江海則廣徵摭地輿區禽族之紛
紛麗色大人之互異或離容以揄揚或端莊而流利或倣
儻以抒奇或纖密以申意或假物以自欣或撫時而有寄
或抒忱以直言或處辭而曲譬雖小大之攸殊各敷陳而
盡義伊前哲之有作實受命乎詩人揜風雅以畫界兼比
興而含神正端敘以履始綴重亂以引申摭贊頌於法度
賅辨論於主賓訂蹠駁於碑誌稽記載於日辰有敷奏之
閒雅得諷諫之和淳繁何體之弗備豈他格之敢倫胡子
雲之貽悔謂壯夫之弗珍彼長楊之特奏或稍勝乎美新
信升高而能賦貽矩矱於先民若夫體製相沿揣摩盡態
指宋玉爲開山呼陸生爲先輩旣仰述其規模因遞承其
梗概入文藪以冥搜挹詞源而旁漑學子虛烏有之詠諧

仿西蜀東吳之間對披夕秀而彌鮮攀先條而可愛迺至
廣簡鍊爲絲蕪藉鋪張爲勸誨拾香艸以相貽揚芳塵而
莫逮未仰觀於前型早取譏於後代若其捷同割錦遲類
礪甑或下坡注馬或上水牽船或三賦成於一日或一文
鍊以十年或著筆於門闥或援翰於賓筵或賦屏風而受
罰或擬上林以成篇豈巧遲之不如拙速邇後生之勝乎
前賢將由預定者鮮躡而極深者貴研復有事等鈔胥語
多摺拾綴古字於行間搏輿辭於雅什將以掘淺爲深倡
奇破習尋物類於偏旁勦大言而蹈襲不知爾雅非離騷
所因凡將卽相如所集自徐堅吳淑之編排更白帖紺珠
之纂輯苟祭纓而求工嗤汗牛之徒淫故夫班張揚枚馬
之波潘陸爲王楊之祖肇風會於曹王轉樞機於徐庾乃
索偶而搜述必就班而按部才不盡於醴陵之江製大備

於高陽之許遂有黃滔賈餗之儔王棨李程之侶奏藝苑
之新聲排翰林之儷語或謂體固卑卑詞空楚楚尋正始
之元音續靈均之墜緒匪弓燥而手柔徒分門而別戶作
者不易識者更難樸茂則辛彝癸占明麗則蜀錦齊紈好
古則太羹是吸獵豔則秀色爲餐彼長卿之入室賴得意
而始官何二都之賅瞻藉一敘以傳觀嗟閒情之敦厚尙
率意以譏彈迺枯樹之哀怨合眾口而流歎苟阿房之畢
讀控霄漢而上博餉五色之易迷陸淤泥而下蟠詎時命
之多舛葢好尙之殊端矧夫言以達心文以表道鸞鵠懷
代越之思大鵬遇希有之息或悽愴而纏絲或寥廓而天
矯悼安仁之閒居拜魯公而佻巧怪拾遺之獻禮嬭右相
以顛倒言與行而相違身與名其孰係惻羽扇之棄捐張
見幾而明曉思媒鵲之清妍宋言情而窈窕賢者固不可

測兮吾又何以識其懷哀伊斯裁之莫企畫絕境而難望
求九能之可與讀千首以自囊儀君山之好問累襲積以
成章味彥和之詮解貫脈絡以求詳晒青蓮之焚選又自
蹈夫疏狂緬香山之作賦亦未歷夫藩牆懿體物而劉亮
誠攬轡乎康莊義植基而正大辭結響以鏗鏘體靡分乎
奇耦篇莫問其短長緯淵深而緬逸負神駿以騰驤粲春
葩之始發朗秋月以方揚庶賦家之正軌繼作者以登堂
泰雲堂文

金匱孫爾準平叔

聖駕東巡 盛京祗謁

祖陵禮成恭頌

謹敘

臣聞蒼牙御錄華渚曜其流虹紫炁充房壽邱揚其祕電
丹陵毓瑞黃雲下覆於三河玉冊延禧赤帝誕生於九井

是以青文丹甲倉頡傳洛汭之巡華蓋交旂元律大甘泉
之祀九年祭畢必隆本祖之儀兩漢上陵首重鍾祥之地
至若啟柳城於孤棘顯項遷都基蒲坂於姚墟重華遺宅
宸居正域雲成龍虎之文天步名區山關蕙蘭之路斯尤
外大國而是疆固萬葉以爲量者也洪惟我 朝神籙獻
瑞朱果誕靈邁子氏之鵠鵬駕夏后之蕙苾三靈効祉軌
規符出震之方六位時乘共斗應承乾之運和生陽谷配
太皞以司春旭燦搏桑叶孟陬而紀令肇基圖大實惟濬
陽

永陵

福陵

昭陵成在其地天垣考曜應龍尾以疏基坤軸分置帶鵬
輿而表鎮山標長白闕日月於四周江湧愛渾定乾坤之

兩戒寶幢高難遙陵太華之三旒神漢飄流全匯火敦之
十采五雲松柏有熊羆呵護之靈

原廟衣冠在象鳥耕耤之地烏號顛陟丹沙值軒鼎初成
絹帳葛鏐陶穴本周原舊跡洵紫濛之吉壤赤縣之神皋
矣粵若聯絲瓜脰奕葉倚蘭慶集珍符祥開運會煥

景命以登庸遂拓疆而定鼎黃鳥底績白魚用歆八表同
風九圍式廓舊邦翼翼是日 畱都規同

帝制軼追孝於堯山創置官司陋陪京於漢苑所以依太
乙而象三垣隆 上都而觀萬國也欽惟

皇帝陛下乾元體撰貞曜竝明亭育八紘鈞陶六幕天聲
所被列聖儔於兩階日昃猶勤協璿璣於七政銀河麗潤
洗甲清三省之風金雞薦秋軌西紀十年之稔固已功昭
揚烈道謨紹庭矣乃復以 青宮侍 輦留襄事於橋山

白臧司晨復眷懷於若水三陵霜露裁疏數於禮經萬國
歡心合升禋之茂典理大物博禘祫同嚴尊

祖敬

宗

帝王之孝爰 命容臺撰典靈憲練辰孟秋之月動 玉
輅啟 璿宮遵皇衢展秋駕魚旂鳥頡梯畢罕而馭風雷
瓊鋌葩瑤扈鉤陳而暉義顯鸛儀星序奉太紫之九旂貝
胄雲屯攤中黃之七萃名王負弩齊驅羽旄之前耆老扶
輪戾止 龍興之域桑麻鋪沃按節候於邠基雞犬恬熙
想風雲於粉社於是虔禋祗肅將事質明柏寢靜嘉榆壇
蔥蔚九州備物德產精英百彙遂昌桐生茂豫醴澂接夏
湛皇澗之仁膏粟告登秋菽甫田之嘉穎求幽璣灌貢稔
秬於

神邱達屋蕭光配標柴於

昊緯榮煖追蠡列義皞而考咸英飢鼎目尊象陰陽而斟
今古十倫九獻之禮全八風五行之舞備睿感昭其淵邃
庭柱生芝神貺表其豐融河久供鑑龜龍呈字榮光映采
於松篁竹蕈垂珠甘露敷其於木葉歆茲格降綏我思成
既而存省高年考陳謠俗巡睇百雉周覽始基敬謁闕宮
載陳庸器胄留宮象非漢世竹皮之冠孤殪天狼壓唐代
榆髀之矢遂御總章之殿閭闔晨聞頒渙號之綸挺垓
澤溥書銜木鳳蠲春稅之禹糧竿植金雞解秋荼之湯罍
晉陽南頓邀置酒於舊宮麟趾蠡斯隆湛恩於同氣鱗辰
綺歲玉蘭青社之英黃髮紺眉鐘鼓彤弓之燕父閭錫爵
大開王會之圖都屋賜酺豈僅宸游之豫由是雁臣歡
溢戍尉率屬以嵩呼鸞御迴鑣乙帳首涂而斗轉悠悠

旌旆驂澤馬以和鈴屹屹城墉界盧龍而入塞是行也展
在原陟降之慕荅敷天哀對之誠鴻翕河墮嶽之規廣錫
類推恩之志洵足輔豐沛之前芬騰靈臺之往烈矣臣備
員史館欣覲隆儀挾天乏藻自慚輶缶之音頌
帝矢歌竊效卷阿之祝謹拜手稽首而獻頌曰

懿惟我

皇堯乾宅位撫燾十年規天矩地肅清三省用成

先志如日中天離暉重麗畢雨箕風飲和食利外洎八荒
無遠弗被鱗集仰流輪裳廩至乃開明堂本孝出治曰此
齊民

列祖所詒學衍心傳道符執契洛範建中演疇福備九品
三適大辟注記鑪金埴埏芸生在器仁涵義鏐陽開陰開
興蓋二儀經綸象緯凝和召甘明昭

帝賜三登婁書更蠲租稅囿獸遊斑沼蚪騰翠百福都庭
貞符景彙履盛益冲乾乾惕勵曰此諸祥
列聖積累於茲十稔宜修祀事惟昔

聖祖

珠耶三詣

高宗周甲四舉殷祭載闡上儀煌煌成例曩耀前星禮
成陪侍遂膺昊貺篤祐續嗣乃命禮官臚占虔筮諏吉相
月日軌翼次除道東巡習祥展義陽鼉戒塗金靈護蹕畢
雲卷旃房精翼軟金罍騰驪虹旗沛艾蒼螭素蚪或六或
四漓虛慘纒螻略容裔後翊豹尾前驅俞騎當戶且渠荷
戈握琬旂裘萬幕爭隨筆轡式瞻陪都寶城有血鳳麟
接洲龍虎拱衛勢控三都氣納百濟龍飛粵區億禩攸
暨赫赫

列祖作邦作對肇域大東遂擴燕冀句驪繫組挹婁奉擎
冬陽夏陰偕來孰使義創軒闢承承繼繼奠鼎神京萬
方輯瑞乃合歡心吉蠲薦饎五穀芳黃縱成五齊餽芬上
歆蘭尊淳泌蒲筵醑醴前揭拔柶瑄牲夕引盥簪取卬升
俎載體鸞刀啟啓水陸精微菹芹蒹芰列耀秀華凝芳都
荔東廂布茲臧羅文闕鐘鳴設賓延旒凝邃山龍火圓六
方作繪百僚駿奔裸將獻饋肅倡登歌壽人安世綬樂在
縣中琴大瑟

孝思昭假上蟠下際優見愜聞思厥飲嗜玉帛效心贖雅
驗意庶旌揚綏金支結蓋

靈衣儀馬雲景晡謁神遊詆蕩洋洋如在鬱鬱神榆無忘
封植蟠根九幽周護玉璽永錫廣仁

大孝不匱九嶷陪營昔盟帶礪公琴兆隅元命作配褒忠

勸功 恩波渥醕醫巫閭鎮敢壇躬祿長白關門瓚幣同
瘞佳氣淵融發祥所自周築澧鎬漢營碭泗方此駿龐曷
可比埒乃 朝崇政鴻臚班第若木暉騰天潢派系昭穆
後先 恩逮揚解大醕 賜復 澤覃陬澁膺備五福鳧
鷖旣醉赤帝陰羽外臺茱幣同我慶成示之無外乃迴
六飛時維秋季慶暑仰徵喬雲繪霽秋空霄迴韻此笳吹
翠輦周經問民飭吏豐和在鵬野多秀穗順時省歛用普
神惠懿惟我

皇聰明聖叡稽古同天功無與二仁育羣生義征不德戶
牖四極日朏月朏玉券十華靈書八會鐫勳銘德恆河曷
計敬祝延洪億萬千歲率土哀誠 一人是矧

水僊謔賦

僊掌欲折銅瓶已冰急景凋歲萬卉兢陵綺疏悄掩蕭寥

無朋乃有嘉植陵寒獨稔名曰水僊亦號女史蔥領葉舉
蒜山根徒裊裊抽莖亭亭吐藥的的金明鮮鮮玉珉人盃
斜傾銅盤挺跼澹一笑而江橫陽明月於洲浹恨牽裳而
其從浥清霜之瀾瀾夫其翠羽拂塵羅幃約素有如洛妃
陵波微步吹氣麝熏鍊顏玉駐又如姑射人肌綽約明星
耀瑤碧霓縈裾玉清小謫愁處織室淺額安黃圓渦暈喜
靈妃顧笑粲然玉齒至若鑄金寫貞鐫瑤表絜匪借溫於
鞠扇不爽信於霜雪羌獨立於春風絢秉氣之貞烈豈素
面號國之妝詎金屋阿嬌之列固宜永伴吾廬幽人高節
崩一鐙於黃昏寫素景之清絕

六朝金粉敘

昔沈東甫徵士纂唐詩金粉錄采菁華斧藻盤繡五襖錦
古製水田之衣百和香濃釀山繻之密綴學之士方間之

家嗜若侯鯖珍逾禁鱗然而窮搜五際不登正始之音博
采三餘屬及貞觀以降瑤山拾級未造樊同金海尋涯徒
遵鮪渚未免塞條遺本餐勝忘歸此藪庵大令六朝金粉
一編所由作也大令弱冠已間強臺蚤上釋褐拜元豐之
渥難藜讀中祕之書既迺六鵝退飛雙鳬遠邁問青齊之
舊俗尋白雪之高樓羊新安本少宦情陶彭澤惟耽歸興
指雛華之秋色柱笏遙看留棠芾之春陰徵鞭竟去北窗
一榻高卧羲皇南面百城覃精謨述是則枕經藉史便可
窮年畫脂鏤久不嫌費日者也爾乃築基典午博極受辛
蘭霜清言茗柯實理書名皇覽孔堂偕汲郡齊開選號蕭
樓玉歎與金羈竝驚測文峻筆自有門風壁月瓊枝遂標
宮體卻說片玉每剖璞以先收安石碎金亦披沙而竝揀
擬隋家之桂苑州次部居仿白傅之陶瓶鉢積寸累波微

紺色如逢記事之珠風落紫文總饋貧人之腹或乃侈心
務廣誇目尙奢貽笑雕蟲見嗤祭獺不知巖卒五萬何如
精騎三千握杜公瞻之編珠光能照剡割邛希範之贖綿
絮若生鸞七寶合成方馮修月之斧眾材畢具可構陵雲
之臺也僕大羅天上同奏霓裳麗正門前旋聞驪唱昔年
禁署蓮漏深沈今日寺門杏鸞齋落尺波電謝宿艸新抽
心傷最少之年難忘平生之語女青男紫誰傳柯古之書
塵榻遺編忽奉子雲之作信傳千古君比桓譚欲敘三都
我慙元晏東阿仙去爭迎國主於陳芳師丹善忘更拾童
蒙之香艸

秦漆漁吳吟合艸敘

箸叢書於笠澤亦載詩篇編倡和於松陵尤詳漁釣臚浮
五瀉祠訪三高欸乃而唱前溪變警而歌子夜則夏道州

之韶濩惟有漫郎說江左之文章最工吳體此權歌竹枝
所以含思婉轉爲沅湘之裔有淇濮之豔也吾友秦子漆
漁浮家射水穿徑蘊塘入禹穴探龍威之書訪吳宮按雞
次之典辨鼯鼠而博物賦吳武而驚人旣已振履雲中看
鸞日下乃復居爲遠志出采文無庾蘭成最憶江關馬少
游長遨鄉里發小海之唱自操土風斂大雅之材爲歌水
調著梁溪權歌百首畫山竹枝百首蓉湖曲十首石塘漁
父詞十首咫船鸞燭詞十首香之爲吳吟合艸夫權歌創
於典午竹枝始自貞元顧或銅琶響急未叶宮商錦砌詞
工偏傷側豔藻續有乖於事實山水未契於靈衿徒衍厄
詞未爲妍唱此則三疊按而笛裂六氣撫而琴和雖復珠
腰蜀鬢三日紀麗人之行金管玉簫百尺寫綵娥之影而
聽鷗撲蜨聊布南國之風樹下門前終異西州之曲況復

馬橋河畔龍尾陵邊尋李相之書堂訪湛公之別墅藉艸
續碧山之社吹煙試黃竹之鑪一斛新泉冷於鸞乳六朝
舊夢醒以松飊鏡高宋鵬之前一枝塢近鸞落綺塍之側
五里鞦香狎漚鷺而尋盟錦帔徑遠數鴛鴦而選夢玉帶
河深凡訪古之崇情皆冶春之逸致至若錯翠爲綸濯滄
浪於谿窠買紅纏酒豔鸞燭於樵青斯又煙波之軼事鸞
月之新聞也準蒞本同岑竹櫺合律山中則桂枝畱客渡
口則桃筍笑人逢山水之清音欲廣招隱攬雲霞之曄畫
足當臥遊披圖而校我忝皇甫三都之敘升高可賦君洵
大夫九能之才

國朝常州駢體文錄卷第三

國朝常州駢體文錄卷第四目

卷施閣乙集文上五十首

陽湖洪亮吉釋存

過舊居賦

并敘

漢麒麟閣功臣頌

并敘

昌國君樂毅頌

楚相孫叔敖廟碑

重脩唐太宗廟碑記

終南山高觀閣銘

師子厓贊

連珠三十二首

涪化縣志敘錄

晉太康三年地志王隱晉書地道記後敘

錢獻之注爾雅釋地四篇敘

孫季述述倉頡篇敘

嘉禾敘

蔣清容先生冬青樹樂府敘

傷知已賦敘

八月十五泛舟白雲谿詩敘

南華九老會倡和詩敘

送汪劍潭南歸敘

送同年張問陶乞假歸潼川敘

國朝常州駢體文錄卷第四目

國朝常州駢體文錄卷第四

卷施閣乙集文上

陽湖洪亮吉稱存

過舊居賦并敘

縣南中河橋之側洪子有舊居焉蓋居之者三世矣後主者以直賤轉買他族乃更徙焉歲癸巳十一月也室有樓上下各四楹樓後有池寬可十步霖潦既集亦生黿魚池側柔桑一株桃實數樹一簿之蠶春足於食三尺之童秋足於果倨倨焉廣廣焉不自知其室之陋也然而夏水甫盛則萍藻帶於周廬秋霖乍淫則莓落生於陰牖出戶之棟黽黽與室鼠競馳積鄰之垣枯株與薜荔交翳室既荒陋器亦敝敗其木之刈而曲者太夫人之織具也其輒之方而折者予童時之唫几也過之者色不怡居之者樂自

若蓋始生焉少長焉及授室焉生子焉歷二十八寒暑乃徙前歲復過之則平池積淤半已作道鄰人以桑翳其室斧其東枝餘者隨墮岸而踣周隄而視則枯條朽蔓無有存者而牆之攀北如昔也復窺其室則敗釜折几無有留者而棟之欲落未暮也里嫗巷嫗集者數輩則尙述太夫人之德不忘因感而爲之賦曰

惟吾祖之令德兮冀樂土之是盤

吾祖居歙縣洪源康熙戊子己丑間始遷常州

遵過庭之雅訓兮就婚媾於江干遷家屯於癸甲兮乃巢

毀而不完

吾祖始卜居白雲巖東後以其宅歸趙氏始遷居縣西大宅歲癸巳甲午家事中落乃更徙焉

駐征楫而陸處兮爰構造之無端借大地之尺咫兮規周

天以爲垣逮予躬而三世兮尙營葺之未安詢東鄰之所

業兮云曲簿而蠟篴拂晨吹於西舍兮職吹簫而給喪連

櫓椽於後巷兮間永晝之鍛聲井泉清而倚戶兮喧朝夕

之百鎗紛吾廬之眾響兮每夜起而徬徨矚虛明而入月
兮瓦雕披而漏霜鳴蟲集於吟案兮鼯鼠經其頽梁美吾
居之何陋兮實先世之此臧桃離離而秋實兮藤宛宛而
春垂風盈扉而自闔兮雨黴牆而不留水東西而十步兮
桑南北以數枝每炎暑之蒸酷兮披後戶之涼颺居陶陶
而自適兮雖屢空而不辭昔先人之食力兮乃終歲而在
行也暨慈親之厲節兮勤日昃而不遑也奉甘糗於尊章
兮爰夜紡而曉經也惟鄰左之責言兮淚沈沈而輟響也
囂聲慚而自化兮薄俗久而益貞訓鄰姬以婦道兮舍姬
集而傾聽迨行之於數紀兮消聞室之競聲憶鄰舍之東
遷兮非垂教於三徙念琴書之去此兮亦豈炫乎仁里惟
居廬之易主兮情紛悒而靡喜犬周巡而不輟兮誰悲鳴
而四起非儔類之是戀兮情亦眷於鳴吠遺縑巾於里媼

今挂別箴於戶裏環車輪而遠送兮盼百步而不已別遙
遙而六載兮乃屢過乎里門池涓涓而已竭兮桑猗猗而
靡存紆蛇出於毀竇兮宿莽抽其故萌伊茲樓之虛敞兮
乃久處而習魂紛一歲之百夢兮每九十而是賁荷鄰柯
之曲蔭兮感檐日之奇溫思吾親之居此兮亦撫子而抱
孫業去此而適彼兮遂違泰而履屯歲月盈虛人生與俱
前負米而養志茲銜戚而晝居雖爰居而爰處孰倚門而
倚閭昔居庫而亦樂今室廣而增歆悟卅年而成世實一
世而此居旣性與境而皆易吾又何樂此一世之餘

漢麒麟閣功臣頌

并敘

麒麟閣者漢宮閣疏名云蕭何造張晏曰武帝獲麒麟時
作此因圖畫其象于閣遂以爲名以予推之閣蓋構始于
文終錫名于武帝漢書武帝紀元狩元年冬十月行幸雍

桐五時獲白麟至太始二年始下詔更黃金爲麟趾以協
瑞應是時漢興已一百十年日月麗于中天文武集于亨
衢時博陸侯霍已入禁闥富平侯安世已爲尚書令光祿
大夫營平侯充國龍頤侯增均已爲郎丞相博陽侯吉爲
廷尉監典屬國武已使匈奴五年按春秋感精符曰德及
幽隱不肖斥退賢者在位則麒麟至是知飲泉食露之符
爲連茹拔茅之兆矣至宣帝甘露三年始圖畫其人于麒
麟閣法其形兒署其官爵姓名惟霍光不名曰大司馬大
將軍博陸侯姓霍氏次日衛將軍富平侯張安世次日車
騎將軍龍頤侯韓增次日後將軍營平侯趙充國次日丞
相高平侯魏相次日丞相博陽侯丙吉次日御史大夫建
平侯杜延年次日宗正陽城侯劉德次日少府梁丘賀次
日太子太傅蕭望之次日典屬國蘇武凡十一人偉矣哉

定策則博陸相業則丙魏名臣則杜張宗賢則陽城儒雅則梁蕭武功則韓趙使節則子卿親賢並升文武備列昔陸機爲漢高祖功臣頌袁宏爲三國名臣敘贊歌詠功德至數十人然徵其美備考其績效均若有不及焉蓋世遭隆平士逢豁達之主得明目殿陛振聲巖廊挾一策入石渠請長纓度沙幕居禁闥而不遺在窮巷而亦顯中殿之馬旣擢日磾上林之羊亦升卜式牧豕極于上相販駿登乎九列亦可謂立賢無方用人不求備者焉此數人者向使生秦項之世值吳蜀之主上則刀筆趨走自擬于駑駘下則筆門瓊牖發聲于蜩螗安能鼓垂天之翼絕塵而逞其驥足哉此鬪穀所以垂涕而言曰知臣莫若君樂羊所以奉篋而泣曰非臣之力君之功也豈不美哉夫以光武之明德悼歎于龐萌元皇之風烈受譏于張禹則知人則

哲從古難之遂使孤臣萬里餘搶地之呼下士百世奏通
天之牘自非英斷卓識鴻業大烈曷臻于斯暇日慕其風
尙不揣謏陋爰各爲之頌亦以存景風之思爲來禩之式
云爾

漢至五世云惟百年德盛化洽麒麟至焉按古圖書識緯
之篇來此上瑞登庸大賢皇皇大賢神明攸贊桓桓博陸
票騎同產旣嬈阿衡亦參姬旦負展畢世放桐不反大節
旣植生知不學英辟握手幼君入抱三踐帝席兩握國寶
勳存畫室忠勒高廟矯矯杜陵畱侯共族兄罹蠶室父治
鼠獄勤勞旣著肺附是屬身膺上衮世執圭玉國鈞旣秉
民譽四洽雅善魏丙不友田甲英英漢廷口議八法彬彬
儒林腹置三篋侯有龍領世爲虎臣千戶旣益萬騎出屯
雖有令德亦鑿凶門時惟鷹揚起于巫蠱功參上宰事歷

三主言求偉伐試覽勳簿震震烈烈篤生營平方叔召虎
來于西京有漢中葉西羌不寧黃髮鮐背爰求將兵神爵
之元天子推轂旄頭初出羽騎始肅光光將軍遠夷斯服
將偃五兵講求六穀高平對策進由儒者頗厲威嚴庶資
嬖雅建策堂陞馳傳天下觀漢故事講求便宜外戚附奏
列侯詳議號通犧畫乃學計倪征和之間八殫鼎沸隆準
寓獄長楊望氣中使星馳園扉夜閉婉孌哲人實司郡邸
中興之相陰德以侯旣主禮讓實惟仁柔赫赫公府恢恢
皇猷不解案吏惟知問牛次公簡簡亦明法律才平獄訟
復議鹽鐵持躬以整應機以疾元平正始實惟憂虞職典
方藥功參立儲幾陷許止乃比朱虛隆漢之規親賢並用
城陽濟北厥後誰踵盤盤宗英名德見重甘泉召對未央
列議輶車七粲汗血千里尙冠以興海昏用廢六經至漢

蔚然羣師琅邪受卦兼擅易旗茲服入廟旌頭墮泥儒術
既隆卿階不替弘羊駢駢比茲心計五鹿嶽嶽慙其經義
東海蕭生起于白屋犯主顏色責相吐握吏持句句友哂
碌碌終登貳宰入授禮服承明高議聲振殿瓦其其及門
槐里蓋寡既趣飲鳩遂請斬馬賢傳既決佞臣斯忤子卿
少卿竝寄絕域一踞胡服一持漢節義重于生冤銜至沒
陵惟霑衿武乃刺血闕帳奏樂穹廬雨霜飛雁不下牧羣
旁皇掘根鼠穴書帛雁足方困紙乳乃畫麟閣肅矣西京
炳靈羣公前後萬古茲惟日中允文允武立德立功平視
九駿高參五龍昔歲魯郊宣尼所歎今茲隴首匡鼎以贊
傑閣雖朽崇勳尙爛望景終隆流芬灑澹

昌國君樂毅頌

皋兆大澤伊綠空桑猗惟若人厥馨亦其生後十世不直

禹湯舉足欲出九野虎狼虎狼之羣鳴鳳萬仞回翮秦楚
斂翼二晉攬茲德輝擇主以進功殊蓋世恩亦逾分三光
旣赫九鼎亦震時方忻亂天未祚德閒騰卽墨功墮騎劫
七十二城悉傳以翼英英鄒彥曾不入燕翩然來斯惟茲
一賢封崇昌國義感沒世身雖居趙引領北視銜恩而息
戴德而死頌于千年以感國士

楚相孫叔敖廟碑

隆古以來吾知之矣高卑甫形君與民近天子猶一方之
吏九重有竝耕之說沾體塗足日接于巍巍茅茨土階不
隔于穰穰魯哉上乎九紀以降五遷以前惠民之實事歸
于元首乎由周以來亢鋸益密閭閻九重黔首不能歷其
一絲露十二圓顙不能瞻其杪又人列十等國及數圻非
夫實心之宰莫就小康之俗而循吏一傳權輿于司馬春

秋五人兆始于南郢則實惟楚相孫叔敖云相君期思之
鄙夫荆楚之下士推其登進之由投分之始則婉孌之一
人膺薦賢之上賞焉道由于莊王罷朝樊姬立侍牀第一
語史臣書于廟策朝宁三歎尸臣易其常度人以謂南服
之霸非君王之謂樊姬之力也吾以謂令尹之進非虞耶
之功掩袖之效也然相君本幼而神靈長而秀巖殆庶鄰
于亞聖儀表出於齊俗有多能之稱稟無欲之性一日出
見跛頭蛇殺而糝之啜其泣矣是將死矣其誰知之母也
聖善庸何傷乎子有陰德是知一成而爲敦蛇耶以之箸
號兩首謂之枳妖德因而自戕及其相也四境咸喜一人
獨弔相君降赤芾之尊聆白冠之語位益高而志下宦益
大而心小同虎乳之三已凜狐邱之六言四牡戒其疾則
利牝馬之貞一狐狯其溫方縫殺羊之韓利前害後悟主

于蟬翼泉輕幣重利民于蟻鼻迫夫百事具舉精心爲政
衡前于輓三年而不知輪庖于相半歲而自易百金之珎
無益而可碎三尺之喙不言而奚事又脩僕區之法擇鬻
能之典舉荆尸之政紹封汝之規惟此文德益之武烈詩
曰元戎十乘軍志曰先聲奪人盛矣哉勝則河雍之瀕封
武軍之尸敗則敖郃之間食嬖人之肉霸業之定由勝算
之先與至夫爲于一日利及千祀築芍陂濬陽泉淮南王
書曰決期思之流以灌雩婁之野皇覽云激沮水之波以
作雲夢之澤後有知者楚南大澤之池誰其嗣之廬江萬
戶之邑謹案祀典曰法施于民勞以定國非是之謂乎夫
其三仕三黜勤拳于當國十世二世綢繆于家事固知尺
帛之煥不逮于生前負薪之困將貽于身後而存資相工
之益沒餘伶人之助越襪荆鬼避一名于寢邱戾岡妒谷

環萬禩于封邑君子之澤非將斬于五世廉吏可爲行有
奮于百代焉廟蓋創于西京之初脩于延熹之歲棟宇隳
壞則感夢示之兆翰與聿新則遷秩酬其德迄二千年有
舉莫廢知縣謝君慕潘國之政紹魏郡之績方校輿地著
士女之志遂覽勝蹟涉名賢之庭見夫曠而不脩憬焉而
懼又以其地逼隘遂移先賢句子之祠祭于別所增其式
廓需以時日廟成乞爲文于石時予方助脩縣志校勘圖
經陵谷未變長技之碑已迷淮流方漲北隅之基宛在竊
以爲旣食其利必報其功連山之竹木相君之所植九澤
之蕃廩小民之所利平田納結則一畝浮于十鐘方舟下
粟則數鄉濟于百縣昔云境圯下溼今惟沃饒上土惠此
中國遺于孫子矣余感夫循良之首美利之廣宣尼未生
不及流遺愛之涕爲賈先隕無由識治民之效而使東南

之民日出而尸祝百世之下春祠而歌舞中興主相間縣
名而動色末世嗣續入崇廡而頒胙則奉法舉職守死善
道之吏均未得及焉是以班固作史宰相入于良吏范氏
紀載司空儕于牧守莫不舉此成法譜彼風愛斯所謂知
致治之體得核實之道矣則夫綰黃綬秉墨車至祠下者
流連乎堂戶畱覽于豆俎遐哉渺焉蓋移風易俗之事孰
不由于此焉

重修唐太宗廟碑記

蓋聞天眷有德五運所以屢隆民報惟功百世而有必祀
矧大矣遠矣聿臻上治之休唐哉皇哉爰同中古之號則
黃帝之壽三百以畏其神炎宗之廟六十思廣其報者矣
醴泉縣唐太宗廟者自宋建隆之歲創自東郊逮明萬厯
之年移茲南郭嗣後百有餘歲曠而勿脩守土者懼焉請

于上官發茲中帑銀凡九千有奇工甫數月而畢乾隆四十五年歲在庚子也天作高山成萬年之寢室漢立原廟藏一帝之衣冠固知魂魄樂游之地近在武功神明永聚之鄉先瞻谷口祀典所以重與夫閭位不列則嗣漢者首唐大統有間則名宗而實祖必推其始有可言焉爰自黃星既見天習瓜分黑水羣飛民隨波沸未嘗知九州百縣統于盈寸之圭四海萬夫責成一人之抱金宿則時時入斗玉璽則頻頻出宮天地之厭亂至矣神人之望治切矣于是六合再朗成于戊午之朝星辰忽降光茲甲乙之館允矣哉太平之運兆于開皇十八年乎一治一亂運天地之生前聖後聖拯斯民之死故上古未奠則八黿開媯氏之勳中天未平則雙龍建神禹之蹟近古未靖則六馬昭唐室之功亦越萬年甫間三聖則陵晉跨漢越秦軼周者

焉尤可異者禮樂征伐並隆一時文德武勳兼隆俄頃定
 龍鯨之駭浪握管而賦小池戢兕虎之雄威擘箋而吟豔
 體何其盛也美矣君哉是以廿三年之政紀在史官十八
 士之文壓于御製梁魏二武對金甲而顏慙高光兩朝見
 華詞而色沮者也至于自家及國則略跡論心陳混一之
 策奮袂而起王師挈九五之尊拱手而歸嚴父此則漢尊
 太上終非有位之稱周得武王方有無憂之實卽或關伯
 構疊元武貽譏此之播稱或云慙德不知西京歌尺布斗
 粟廟亦稱宗東征賦取子毀巢名無嫌聖恢恢乎包舉天
 人之槩非一端可議者乎知縣蔣君宰斯三載禮祀歷時
 護青蒼之冢樹綠以紅牆法太紫之星垣建茲黃屋三過
 昭陵之作世遜其工式瞻畫象之文人推其博當惟新之
 落成乃徵詞而授簡亮吉再辭不獲三歎以興昔者龍鳳

挺質表偉度于書生今茲蠡眉負文紀殊勳于下士則通
天哉我曹嘉沈炯之表漳水浩浩永鑒陸機之文其爽邁
咎者諒鑒觀在今也遂使兒童父老嬉遊忘天日之尊棖
棟几筵環拱聚川原之勢他日者過驗穹碑來觀典禮庶
幾衝山之風忽起西接上郡之祠如龍之雲怒飛東連豐
水之廟云爾

終南山高觀閣銘

鄠縣東南行三十里有高觀潭谷水出焉五里未及驚霆
接天百步尙縣飛瀑搏頸洵人外之奇觀霞表之靈境也
若其危崖半傾若斜景之入海巨石自轉同高穹之隕星
曾不踰時已抵絕壑雖激電之閉戶飛矢之出林不是過
也春雨旣積山空自鳴萬壑競乎一門百丈限之盈尺此
則山澤氣阻陰陽與之回皇風雲色變星辰因而匿采者

矣余尋幽匪遙好奇斯過遵彼磐石薄焉觀之齋心旣空
盈耳有悟遂爲之銘曰

鯨波乍湧龍氣猶腥高欲切漢光凝浴星頽峰作檻劈石
成扃出竇始白回瀾乃清流金迄石衝谷注壤晦若輪靈
坻隤遜響遵巖覩電頻壑尋雷天地黯慘風雲蔽虧無人
獨往有月飛來

師子厓贊

自黎平未至天柱縣百里有師子厓焉予行黔楚中幾徧
矣若茲之奇則未之覩也青氣往往往迷茲嶺坳元岡纍纍
突出天半其下則表裏洞達東西延袤已枯之松倒挂者
千尺欲落之石相黏者徑寸輒無能停瞬不及轉如此者
半日方抵平坦則麥隴鋪秀雲光凝錦延回一邨異景百
出高曾居巢卑幼處穴一榻之外無非雞豚百仞之餘乃

匿牛馬怪魚窺人頭尾五色妖鳥踰客飛鳴百回黃果滿
樹卽兒童之糧紅蕉百尋裁蠻女之袴此則吳越山水遜
其靈奇荆江土風減彼殷阜者矣贊曰

石若立榦巖如覆孟穴腹空洞倒生樓欄奇邪欹崙常有
落勢人行其間目輒上視紆行百盤直下千級厓方師蹲
馬忽人立

連珠三十首

蓋聞十日竝出不若陽烏之再中百川疾流不若靈河之
東注是以日中見斗燭物之理自存山下出泉朝宗之心
已著

蓋聞以近槩遠中無豪釐舉後定前失者什伍是以宋國
五石忽憶前身爲星泰山一雲安知異日作雨

蓋聞片壤之安羌蝦逞其智一葉之庇螻蟻仰其陰是以

吞巨舟者必思江海爲家戴尺木者乃以風雲爲蔭

蓋聞威劫于外則不非其非智昏于中則非類亦類是以指鹿作馬者刑餘之臣以驚當鳧者刀筆之吏

蓋聞造物之儲或畱而不用聖王之制每過于所防是以一世之眾飲不竭河而供之以江海萬夫之勇超不越丈而限之以城隍

蓋聞塵揚席上灰然鼎閒飛揚雖同涼燠以異是以灌夫罵坐難止膝席之賓次公酒狂羣驚仰屋之歎

蓋聞力竭智窮則愚者必收拙効識大見遠則惑者不嫌過計是以塵當揚海故冤禽之志不衰杵可倚天則杞國之憂匪細

蓋聞勢盛復持以奢必無以處時過日午又益以火必無以禦夜寒是以朱門矜土木之工不能以片瓦覆末世祖

宗饌飲食之譜不能以一飽貽子孫

蓋聞跖塗萬千不當殉之以跬步今古億態不當處之以思議是以立志可以入世故萬物漂動而金石不流無心可以貞運故七曜改色而風雲不壞

蓋聞器適于用貴賤之形泯材值其候小大之勢易是以二曜不可鑑景慙于半規之銅五嶽不可厲刃遜于一尺之錯

蓋聞分有可冀則豁望難盈物非所勝則庸愚念息是以鷹隼卽驚不求虎豹之腥漁人雖貪非冀蛟龍之獲

蓋聞獨心雖智謀事不臧隻拳雖勇遇敵必僨是以明堂九仞承之以百柱則安迅流千里障之以一簣必決

蓋聞邪正殊者必無合志之言得失明者不爲無益之事是以爲盜之室寧致禱于黔婁習佞之夫不交魂于汲直

蓋間巧匠制物成毀難定明鑑過景曲直未分是以漢壁千鎰不能止亞父之碎秦鏡百具無由燭趙高之佞

蓋間善之與惡氣必相感利之與害勢有各驚是以栽棘成林鵲鴝樂其安宅平衢似砥狐鼠以爲畏塗

蓋間思匿其短者以猜疾爲肺壅冀遂其私者求黨類爲膠漆是以無鹽入室視明燭而必警癯者過市見曲瓢而自慰

蓋間五簋登筵旨者早盡千葩攢樹豔者先摘是以終童夙慧不臻厭次之年龔生竟夭乃致彭城之涕

蓋間誓苦而不信者五嫁之妻力勤而不錄者屢逃之僕是以秦室之行非藉于指天晉文之臣不煩于投玉

蓋間非神無以燭事而或有所窮非勢無以馭物而或有所遏是以珠玉沒水日月不能垂其照魑魅遁虛雷霆不

能施其烈

蓋閭節有至奇視其所發行有甚烈必貴得宜是以證羊之直用于子而不慙嚴父抱柱之信移于女而必爲貞姬蓋閭乾煦坤和矜垂于微末日變月蝕兆起于纖豪是以一婦至冤東海有赤田之旱匹士銜憤吳門成白馬之濤蓋閭能有所盡智有所窮安之者聖強之者愚是以六合之外不知仲尼故聖于鄒衍五經之表不議孟子亦賢于莊周

蓋閭懷思一入則萬態助悲華心旣揚則百族盡煦是以朱戶累累明月至而益輝蓬閣蕭蕭寒風來而若怒

蓋閭飛霰于夏時苦救而天灾成舉耒于朝民勞同而主事廢是以馭一世者以不勞成勞調四氣者以不德爲德蓋閭秉萬族之秀則物遜乎人成一節之奇則人希乎物

是以充廉士之節必爲蚓而爲魚言君子之化或成蜃而
成鶴

蓋間能有獨擅理不得均器有偏饒勢無能共是以田實
之家以千金而易一賦枚馬之室用萬言而貸半鐘

蓋間美醜雜陳要于取法剛柔性定貴擇所從是以下士
心競視流水而可平懦夫氣衰見高峯而亦竦

蓋間嚴霜被澤嘉艸同萎野火燎原仁獸亦夷是以君子
業業不垂禍福之言小人皇皇乃箸灾祥之論

蓋間理無所宜必求實効用各有適無貴虛名是以琴瑟
雖雅非能引之論心鸞雀甚馴不可委之守臧

蓋間炫寶于門伺者百盜露奇于世忌者萬夫是以尺璧
在抱必加再襲之衣積金之家恆箸重扃之戶

蓋間拔木之獸天不能不生而有山以相域惑川之蟲地

不能不載而有墟以相容是以魚假之足則江海之塗必塞虎傳之翼則城郭之民已空

蓋聞貴不若賤以計得失智不若愚以識趨辟是以萬眾局縮蹈白刃者烈夫一世震懾犯龍鱗者匹士

涪化縣志敘錄

予自歲辛丑入關。擬定此間方志者三。同州之澄城。邠州之涪化。長武是也。關中地大物博。又諸紀錄自漢三輔黃圖以降。暨唐韋述關中記。宋宋敏求長安志。程大昌雍勝略等。咸可準繩。而府州縣志可采者蓋寡。蓋明代諸賢事非師古。苟爲簡略。卽故城舊瀆。皆棄之如遺。今所盛傳武功朝邑二志。不知者以爲實過古人。非篤論也。予爲此志。一準晉賢。非苟求立異。實欲藉茲成規。示諸來禩。凡爲記八。爲簿二。爲志五。爲略三。共三十卷。凡五閱月而成。其敘

日。

古縣今縣新城故城黎園舊鎮流金留鄉咸攬川陸附之
橋梁倣晉朱育會稽土地記等述土地第一

史言甘泉傳志石門治谷引涇荆山導汧灌溉之利被于
無邊倣齊劉澄宋初山川古今記等述山川第二

史家遺法首記大事三千餘年如掌可指倣漢司馬遷大
事記等述大事第三

古云吉行日三十里披諸圖經式其遺意倣隨西域道理
記等述道理第四

嬴秦築宮遷五萬家越漢始元徙民三輔良規旣失志丁
略戶稽其盈虛逮今淳化倣宋元康六年戶口簿記等述
戶口第五

惟民之俗百里不同爰志士女逮農商工倣晉周處風土

記等述風土弟六。

雍州積高。神明之區。雲陽甘泉。又帝所居。下暨小鬼。靈而不誣。倣齊祠廟記等。述祠廟弟七。

世遠莫追。金天有陵。青鳥之冢。圖書可徵。倣宋李彤聖賢冢墓記等。述冢墓弟八。

秦皇漢武。築宮祈仙。洪崖弩陸。增城在焉。百世飄忽。羊牛下來。下土奏賦。通天之臺。倣晉洛陽宮殿簿等。述宮殿弟九。

征輸之簿。前代所無。農桑絲粟。以迄市租。冊籍可稽。職于胥徒。倣宋李常元祐會計錄等。述會計弟十。

泮宮居前。叢祠列後。其其羣賢。光我俎豆。倣宋崇寧學校新法志等。述學校弟十一。

才餘于官。不廢嘯歌。此如傳舍。所閱既多。倣宋無名氏衙

署志等述衙署弟十二

白公鄭國民歌至今王陽作令亦有遺音采其遺蹟以代吏箴倣唐杜佑通典職官志等述職官弟十三

世需多士士貴通經茂才異等咸貢王庭倣宋崔氏登科記等述登科弟十四

廣陵列士會稽先賢列女後傳撰于顏原邑縱最爾無微不傳倣晉常璩華陽國士女志等述士女弟十五

金石之文古稱不朽彙茲豐碑庶傳于後倣宋鄭樵通志金石略等述金石弟十六

淵雲之作冠于簡端國師峨峨亦賦甘泉後有多士庶幾前賢倣漢劉向七略詞賦略等述詞賦弟十七

凡志方隅必推今晉稽乎古圖準以今尺惟茲一編咸述舊聞勿淆其次以俟後人倣常璩華陽國志敘錄等述敘

錄第十八

晉太康三年地志王隱晉書地道記後敘

靈巖山館叢書大類有三小學家一地理家二諸子家三地理自山海經至宋敏求長安志凡若干種先生以亮吉麤知湛濁稍別廣輪每成志地之書輒預校讐之役開逢執徐歲壯月所校太康志地道志二卷刊成授簡賓筵命書後敘謹按太康三年者晉平吳後第二年也日南之地甫入輿圖建業之宮裁爲郡治于是潘岳著關中之記摯虞成畿服之經王範上交廣之書徐氏作都城之錄唐李善注文選稱太康地志曰都廬國其人善緣高是知州郡之外又志八荒風土之餘兼詳異俗拓地萬里成于二紀劉石未興揚益旣滅令甲之所載典午之最盛云厥後賈耽之述四夷樂史之詳百國蓋權輿于此與王隱以作史

之才。箸承家之美。時則五馬渡江。纔逾三主。羣龍戰野。已沒八州。而史氏區區。欲按伊洛之圖。舉秦畱之界。雖寰中百縣。曾隸方輿。而海外十洲。同夫飄渺。撫劍及伊。吾之北而塞裳。阻天限之江者焉。今觀所述。姑臧穀遠。辨方語之譌。大夏令支。補職方之闕。采聲罔實。或見諂于鄺元。縮籍陳圖。庶亟登于劉氏矣。以此編摩。推其紹述。則仲遠一記。旣導美于太康。彥季全編。殊有功于處叔。飲水知源。撫柯求葉。亦沈約魏收之祖也。

昭代右文。坤輿日闢。

皇帝復撰靈河之紀。箸灤水之源。輿書歸于乙部。廬牟資夫。

宸斷皇皇大哉。莫以尙矣。先生才爲命世。學旣專家。每集一編。期乎匝月。煥綠字赤文之采。補蘭臺石室之藏。茫乎

莫測興望若之驚疑者勿言守闕如之義亮吉不敏遂不辭而敘之云爾

錢獻之注爾雅釋地四篇敘

重光赤奮若元月吾友錢君獻之注爾雅釋地四篇畢時予方疏國語地名未竟病茅驄之莫定阻彤魚之乏證旁采金石揆稽或窮高觀周秦披覽亦徧吟遂得于許氏皋落證以韓生廣都之壠注乃增乎韋昭卑耳之谿名堪通于劉向以墮高之文識觸山之語誕由田渭之蹟知惠寶之傳疑國語其工氏墮高墜痺知列子淮南觸山折柱所由附會也又晉語爲惠公從子于滑濱滑濱韓非子書作惠寶子書作茫茫一編窺古獨笑焉蓋六合云渺難從豎亥之步三古甚遠誰詳伯翳所名而儒者好破舊聞矜其臆獲甚或變易陵阜移徙川澤此則超北溟之說非屬寓言移太行之語遂成左證也夫創奇者旣信心之已過守故者

又目證而或離以數雜之居諸窮八埏之浩渺知其難矣。又況高下定名肇于文命川藪著錄仿自元公梁卜之所未言樊李于焉缺注卽云證之別簡而東陵未究先地昧于金蘭。漢地理志廬江郡金蘭西北有東陵鄉水經注廬江郡有金蘭縣故金蘭無所考二漢亦無此縣水經注縣字當有誤橋山屢移遂神迷于劍舄而能采茲眾說成乎

一是高平廣平皆區方之可指朝陽夕陽非向背之虛號則前哲之所未及視景純而或過者焉時孫君季述亦注山海經削諸迂怪之談證以耳目所及捐夷堅于上世諒厥用心友妻鄺于六朝均茲命意蓋輿地之學至今日而言者益廣亦訂之益精也若夫日下之所在息慎之爲方此之闕疑師夫前聖

孫季述述倉頡篇敘

倉頡篇者吾友孫季述之所述也粵若龜浮效象兔泣垂

文視狗知畫犬之形。伏禾制禿人之字。子夏釋物辨丁平魚枕。秦醫說疾。惻蠱于蟲皿。徵之竹素。靡不粲然。衆乎左隸之分。遂失前人之誼。安國不以篆文存經。而易之隸。古康成頗以便讀傳教。而塵存故書。是以白羊之印。乖謬乎六書。烏馬之文。微茫于三寫。必窮其失。可得言焉。漢世諸儒深研象數。漸忽蟲文。言星者日下從生。說地者土力合乙。箸衣于求。而古文昧。增竹于匪。而物象離。以曲爲聲。失豐形之字。惜加食爲餽。達稍氣之本訓。習甲乙之文。誰分鉤識作乙。信卯金之讖。孰辨處者爲畱。自茲以降。益難更僕。參首以公。能足爲三。犯从戊己之形。殷有丹青之義。書狙狃而字改。傳汎汎而文增。爾雅變夫龍龜。玉篇益其鼯。鼯訇改爲圖。音或符乎漢碣。辭譌爲薩。字始缺于儒書。楞以四方切從十數。此則呂顧偶亂于前。陸孔復乖于後者。

矣。求其合者。則八子系一士弓長。艸肅謠齊木。亘識晉
委安可通。非姜鼎而始見。近片本一證。周彝而益明。此則
謠詠合于經文。假借通乎字例者也。至若作旅車敦。古義
莫釋。帝儻之畜。姓纂亡徵。橙栢不登于昔編。箇箇互殊于
傳注。寧非闕如之義。當同于聖者乎。夫篆之降隸。增減見
于斯篇。文以摺音。精博昭于許說。今召陵之書。廣傳于學
者。而上蔡之論。半墮于梵編。此季述所急爲搜輯也。亮吉
年逾數雜。學歷五稔。別石鼓之舍。志在益簪。訪倉史之臺。
使觀此冊云爾。

嘉禾敘

兵部侍郎兼都察院右副都御史巡撫陝西等處地方兼
理糧餉軍務加一品服畢公再隸陝西之二年。今上四
十六年也。燕康公之分陝棠表其年。魏成侯之治秦釜銘

其德來歌去思于于平原耆六郡百縣循循乎成法蓋下車未幾而四月登麥先慶有年三時勉農不遺厥力皇皇乎新政之首效也未幾涼州一隅番回肆逆公靡分畛域首運機宜立甲雕戈具軍於一旦白鹽赤黍籌餉于千里天子嘉焉叔子緩帶不張鈴閣之威元長黑頭早錫上公之服偉畫所至蠹爾藉寧和風旣蒸應者日至于于是十日一雨天瑞實惟醴泉雙岐合塹地寶名曰嘉穀則長安縣某鄉之某鄙一本兩穗之禾實生焉原露未晞甸人以告猗與美哉于傳有之嘉禾因而名冊其效遠矣美稷以之立縣公方抑然不敢自居欲附捷書因茲入告此則江夏獻冊字美平方書陽翟陳圖名貞于瑞志者矣且禾名同本異類革心之應也種曰銜滋同生樂化之效也匪惟政祥抑亦國瑞亮吉以爲當立茲樂石貽諸後政遂原而敘

之云爾

蔣青容先生冬青樹樂府敘

蓋聲何哀怨杜鵑爲望帝之魂變亦蒼皇媛雀盡從軍之
侶遇金人于瀚上能言茂陵值銅駝于棘中誰知典午又
況南遷燹火北狩軒輿言平締造則東南置尉拓疆無劉
漢之雄及此淪胥則五百從亾歸骨少田橫之島嗟乎江
山半壁非僊人劫外之基金粉六朝盡才子傷心之賦今
之作者意在斯乎昔者申徒下土赴清冷而不辭精衛冤
禽投滄溟而不返此之挺質本視鴻毛未有九重端穆辭
黃屋而桑梓萬燦輝皇褰龍裳而蹈海此卽鱗臣効順不
能使東海之波不揚而孱主奚堪更非若南征之舟不復
者矣夫赤眉構禍隆準之寔斯開臨洮肆凶銅馬之帝遭
酷不過行同竊鈇號等摸金雖下竭于三泉尙不讐于枯

骨而此之慘虐更所難言斷首剝膚毀裳裂冕烏呼吞炭
雖忠智伯之頭已漆納肝較晚懿公之體先殘至于掩骼
之仁出自采薇之士問中興之顯運荒土數括慨六葉之
承華冬青一樹卽遺黎之感槩何補于在天之沈痛也哉
雖然萇弘化碧激衰周義士之心比干剖心作洛邑頑民
之氣焚山之節旣顯之推匪石之誠亦逾生歟若夫廬陵
信陽之大節其效龍逢夷叔而分塗者乎迨至風雷一警
遂歸先軫之元陵谷已遷尙識王琳之首哀矣怨矣求仁
得仁蓋士感知已伯牙碎琴義激友生漸離擊筑效包胥
之慟哭慷慨登臺賦宋玉之大招芴皇生祭三百年之運
已盡庚申一二士之心猶回天地覆亾之慘從古無斯而
忠義之忱亦于今爲烈者焉他若生而玉食長自天家山
陽哀痛之語命在何時樂陵永訣之言兒乎奚罪柴車而

舜鳳闕破夢而入龍沙烏乎富貴已空神仙何在徒使王
輦金輿禮化人于西域黃冠繡鳥望紫氣于東來此則靈
妃入道固無心不死之方而室主移宮獨甚此未以之痛
者也況夫微子朝周猶存禮樂項伯入漢僅事功名韓王
孫之晚節漂母見而益哀劉宗室之陳符列宗間而大恥
他若運屬當塗華子魚尙稱名士言歸石趙王夷甫更侈
清談彼人是哉何足羨也嗟乎蘭臺著史婦豎不能識其
辭隴西隳聲指紳或爲諱其語何似取陳畱之軼行抵掌
而說中郎借赤壁之遺聞快意而談諸葛則人驚伯有或
能廣閭巷之傳而鬼有董狐殊堪增竹素之色先生于是
屬爲之敘遂箸于編若夫聲音之道文字之工則讀臧洪
之傳髮自衝冠登廣武之原皆先裂血抑至此乎非可詳
矣

傷知已賦敘

粵以仲秋之月久疾乍痊孟冬之辰二毛甫擢悲哉無金石不流之質有蒲柳始謝之姿犬馬之齒過齊太尉之生年羈旅之期逾晉文公之在外接於畫者希逢舊識覲於夢者懽若平生以是而思伊其感矣於時窮谷日短關門雪深清渭濁涇共滔滔而東逝太白太乙與蒼蒼而齊色駕言出遊塵問所之松柏合抱云是含元之基藜蒿尺深言經端禮之闕鳥飛反鄉值弋者而登俎獸窮走壙遭野虞而褫革戴日而出炳燭以歸萬事迫於窮冬萬憂生於長夜秦聲揚不能激已阻之氣魯酒薄不能消未來之憂叢臺有霜殘月無景鄰笛起於東西荒雞鳴乎子亥嗟乎同風美人之曲楚臣殉之以身鐘鳴落葉之操帝子繼之以泣大地搏搏非以載愁惟天穹穹豈云可問是知掘井

九仞冀可覲夫泉塗載鬼一車必當逢乎素識復沛郡丈
人之魄或尙沈酣起魯國男子之魂猶應慷慨生我者父
母知我者鮑子嗚乎於是綜其梗槩述其終始虞山邵先
生齊燾大興朱先生筠清苑李先生孔陽尙書錢文敏公
博士全椒朱君沛明經高郵賈君田祖縣丞黃君景仁舅
氏大令琦中表定安定熙凡十人

八月十五泛舟白雲谿詩敘

小雨忽姓秋花轉媚雲谿小閣月來沈沈錢唐郭生南巷
呂子或攜壺觴遠挈簫篴子與孫君買舟溪港徑可十尺
租才百錢王生居塵疊市甘脆菱栗之屬粲已盈艇與二
三子拍浮其中障褰作帆折柳代檣西經紅橋東阻北郭
兩岸宿鳥一川遊魚隨波沸騰離樹上下啾啾唧唧聲不
得歇沿谿以北稍有竹樹下蔭密藻寬可彌畝黑白萬羽

浮沈千頭波喧葉飛悉萃其裏從洲以南欄瓦可數橋陰
數尺乃界中外孤簫一聲高樹荅響呂生歌狂不覺離口
樓閣半里鉤簾一時兒童不眠應以拊掌歌韻欲寂盈觴
勸酬欣羅狂談樂說舊事忽復相覩首已如沐唼肩旣冷
零露可挹離離星辰方訝西暗川東曉華驚見日出相與
登岸因而賦詩里傳其狂朋訝爲逸嗟乎半世之樂成于
奉親百晝之娛奚若選夕奈何中歲各值多故星辰渝乎
昔約風雨破其奇襄顏非朱而潭鯉驚衣皆麻而林鳥訝
此則攬盈尺之照則逃景于閨聆入秋之聲而離樹卻走
也以少歲之遊畢于此夕故振筆敘之以貽數子亦以志
不怠耳詩凡若干首時乾隆四十一年丙申八月十五日
越三歲己亥十月二十日敘同游者爲錢唐郭鎔同縣呂
星垣孫星衍王育璇凡五人

南華九老會倡和詩敘

乾隆十四年吾鄉莊氏之致仕居里中者凡九人曰禮部郎中清度年九十曰福建按察使令翼年八十四曰臨洮府知府祖詒年八十二曰黃梅縣知縣贈文選司主事樸年六十九曰密縣知縣封福建臺灣兵備道欽年六十六曰開州知州學愈年六十三曰湖南石門縣知縣封甘肅寧州知州柏承年六十三曰射洪縣知縣贈順天府南路同知大椿年六十二曰溫處兵備道封禮部右侍郎柱年六十因爲南華九老會各繫以詩其宗之年及六十而未預斯會者復二十一人各依韻和焉盛矣哉非特宗族里鄉之榮益昇平之僅事矣且數公者旣無巧宦之目仕有廉吏之心彈琴之治甫成拙簪之情已切其在官也種秫之田無五十畝其謝事也成都之桑少八百株貴而能貧

知止不殆此其高致一也居鄉與人子言孝與人弟言弟有公綽之不欲法嚴平之自然風貌樸誠肖其被服卜商不假之葢酷暑而詎張晏嬰已敝之裘奇寒而始御其高致又一也東西之第匪遙釣遊之所不乏葭莊之魚涉春而已種蘆墅之蔭經秋而可采方伯別業實曰青山尙書廢園亦名來鶴永曰永夕斯陶斯遊觀邦國之蜡曳杖而必偕賽里社之神聯裾而早集其高致又一也維時風俗旣淳里居最樂盈門頌白之叟占野屢豐之年然而刻魚入饌行于鼎食之家束脯爲禮饋彼歲時之會從大夫之後亦竟徒行避長吏之庭有同由徑薦紳之讌市僧不列於筵士夫之尊吏胥罕識其面均得遂彼恬適享其大年其高致又一也家世傳學則有夏侯代不曠僚實惟沈氏是以隨會旣老變句嗣而登朝望之未休育咸皆成廡仕

門閭之盛里鄰榮之而數公者處貴寵而不矜與寒素而
鈞禮羣從之謹飭者賜嘉果而必奉子弟之通脫者逢棄
馬而亦數此則十室之邑忠信所存百年之宗家法斯在
其高致又一也予少以孤童逮承顏色高山仰止不去於
懷乃文考欲賦靈光之殿已頽孔融成童老成之人先謝
是可戚矣石門君孫宇遠世其家學早有令聞懼良會之
就湮遺翰之放失遂各係以小傳竝索敘于余余惟九世
卿族首數乎寧俞萬石素風或衰于石慶花樹之法不及
於百載棠棣之碑僅傳于數紀皆名宗之所宜鑒也故原
其本末敘之所以紀人瑞之符亦以垂後來之則云爾

送汪劍潭南歸敘

夏序忽來獨居已覺絺裘更雜以風雨晝長宵短興寐
不定置雞于窗將以警旦乃復鳴夜籠鐙于牖所藉燭暗

不覺妨月意緒乖違跬步錯失貽譏儕輩匿笑臧獲蓋自
子欲歸已不憚累日幽憂不已將成痼疾繼而念之吾與
子食桐江之魚棄子悉已成鯉擘山院之果遺核又復抽
林蓋山川悠悠言笑宴宴不自知元思之減華色易醜也
且吾與子得曜景數紀振響十步中下之士樂與齒序瓜
桃之盛識其嗜好閉戶以處雄長婢僕出室而遊亦有處
所無昧于明以視日星不跛于履以羞厚地握管徑寸上
溯結繩申紙逾尺下窮倚杵自謂闕毛角而俊視植物而
靈者矣何必移原隰之艸萃于一丘招高下之鳥同棲一
樹始欣欣合色喈喈均響哉吾子行矣奔轂戒疾沙川鑒
沈凡百榮利以爲子儼憂無傷性喜無蕩心百歲相保有
此骨肉怡怡飲食跂跂動作從此及老脫復偶遭髮白面
皺起而相嘲勞于聲于蚓竅假一寐于蟻垤冥冥于萬古

憤憤于七尺無系于覆載無害于動植蓋同形而化者不
無聖賢代我而生者又有孫子也子行矣子不能飲勸子
以食子食而咽歌以蕩魄歌曰

風起匝地雨落晦天念子不見卽如百年百年亦勞有生
有死其閒握手乃在吾子此無彼厭子不我嗔飽食嬉遊
以說性眞各知其短愛契所長閱于歲時殊忘否臧誰驅
而出誰挺而走念子之歸倏如驚獸投林覩柯不擇其音
慨我之畱得不怪禽獸則有穴禽無故枝歌曰贈子孰知
我思

送同年張問陶乞假歸潼川敘

乾隆五十六年歲在辛亥二月朔日張君問陶給假歸蜀
其友洪亮吉烹玉田之蔬挈山陰之尊送之于國西門曰
足下家居遂寧婦畱成都鼻子宦粵旣傷親心羈臣贅秦

復悲身計然則足下辭金門而南邁竝赤日以西馳勞乎
此行蓋非能已仍復迂道嵩洛戒途雍梁爰謀裹糧竝訪
親密西嶽道士留之而不能東方細君隨之而竝返百步
之外弱弟出迎一門之中密親咸萃解笏金而貯案被采
服以娛親雖嚴生告歸相如稟傳不是過也又足下宰相
五世孫也葛侯冢畔八百之桑尙存召公祠旁一隅之宅
能割谿茶可摘則病婦攜筐山筍欲抽則衰年補徑秋原
半頃稅給于王官春韭一畦食供于家老而且煮米作糲
春麥爲羹以資餘人或給耕者甫生之犢等愛于孩提頻
來之燕視同于親故則亦物我均適心形兩忘者焉又況
蠶經禽演不乏奇書蛤港螺田別開精舍臘頭識客社尾
迎神朝衫忽箸則鄰里詫觀縣令偶來則牛羊突竄南軒
旣開北牖時開果落枕前花生鏡裏一林百樹招誰辭雅

雙澗疊波畱魴放鯉若是者采其吉語娛我眉梨懲彼殺
機戒茲子弟播三田之種閣上巡觀賡七月之章房中屬
和未嘗不集吉門之慶極幽居之致焉定省之暇時而出
遊則峩睂當其前青城出其後大江流其左資水徑其西
解角之鹿可施鞍橋浮鼻之牛以當舟楫餐雲欲曙之領
采藥斜陽之州園蕉數尺非佞佛而可趺危梯百層不學
仙而亦往閒防疾厄時覽方書偶有篇題緘之經臧此則
金門大隱不止平原玉筍真人復來宏景若夫僕與足下
之交道又可言焉僕處鵝音之里君居吹日之方蛩蛻之
合無由牛馬之風不及乃闕前一覲忽若素知飲中百篇
愛同前哲顧性憎釋氏不侈前因亦鄙道流詎云緣法靜
言思之或卽吾儒所謂如舊相識乎夫卅年成世足下旣
近之僕則又過半矣頽仰一身離合萬里常恐百年交道

不盡然精氣不散當成神明風車電帷來往不絕則僕與
足下又何慮哉又何慮哉自此之別一日之內僕眺日升
君眺日沒一江之水君飲其源我飲其委則亦何嘗有須
臾之間遠近之殊哉保齋神理時時讀書簡牘不詳悉之
于夢亮吉頓首